

Primera Carta a Timoteo

Kjibokwo ère tara Pablorë

Timoteo kong

Kjibokwo ère sorë

Domer shäng kjlara ko Pablo. E Sbö tjlökwö laga Jesús äska wleniyo. Domer shäng kjlara obi ko Timoteo. E data Grecia so, mekë judío. Dëna mite obishko ga sök Listra kjokyo. Eshko ga Jesús roy pjlu lara Pablorëshko ga tjlökwö kjrara. E irgo ga e kjrara Pablorë beno shäng parkë ba tjok, tak pjang Hechos 16.1-4 go sorë li eni. E irgo ga parkono ara Jesús roy pjlu lë kjok shto oblë oblë.

Pjlara ga parkë shäng Éfeso kjokyo, Jesús tjlökwö kjragara löng eshko li kägäyo. Sök eshkosho ga kjibokwo ère tara Pablorë ba kong. Woyde ga Jesús tjlökwö kjrara kägäyoga parkë sorë li tara ba kong. Nopga wlëy pak oblë oblë shäryë sorë li tara ba kong. Llëbo owa shärye Jesús tjlökwö kjragara löng eshkorë li lgweya sorë li tara ba kong bakoe.

¹ Kjibokwo ère taga tja Pablorë. Sbö, e bi döga. Koshëy löng li, e Cristo Jesús. Tja kjrara, ichara lok ber ba tjlökwö roy laga Cristo Jesús äska.

² Timoteo, kjibokwo ère ichër jek bop kong. Pja mär Cristo Jesús go, pinor bop kong sorë li eni. E kjishko ga pja bor wa wleni.

Rokër Data Sbö kong, bi Tjlapga Cristo Jesús kong ga ba wopjlu li kjishko ga pja kjimte lok ara, pja songe le iyado, pja ie lok ber shäng wlëp bakoe.

Nopga oba ping tjlōkwo bek llēm li go wleniyo

³⁻⁴ Éfeso kjokyo ga kjong kjong lōng oba ping tjlōkwo bek llēm li go. Tja jek öör Macedonia kjokyoshko ga pja rokoror ber sök Éfeso kjokyo wlo. Pja ichoror tjlē nopga lōng eshko li kong ga «Tjlōkwo bek llēm li lëy ame. Llëbo weno tjlapgaga tek dēnashko so kong li lëy ame. E jyō bakoe. Ga pjāy kjlara kjlara tjëyo kjone dey'li, lëy ga pjir llëme. E kjīshko ga e lanyotkëy ame. E lanyotkoromi ga oba ënglë kar kar erä. Woyde Sbörë ga shji mär ba go shara, shji ber lōng ba pak li shäryë wlo.»

⁵ Pja ichoror eni, shji Jesús tjlōkwo kfragaga ëng woydë ara kar kar wlo. Shji ëng woydë wlo ga woyde ga llëye owa woyotjlīy llēm, llëbo pjlú miydëy li shäryëy eni, shji mär Jesús go jlōkoyo bakoe. ⁶ Kjong kjong omshäryë lōng ame. Llëbo tjwlō llēm li lanyotke beno lōng eröe. ⁷ Opyë woydë ber lōng no pingga kjok llgwekklo tara Moisésdë li go. Le lōng jlō wleni, gueniyo jlōkoyo ga llëye le lōng li, e llë loklo miyde lōng llëme.

⁸ Miydëy pjlú ga kjok llgwekklo li, e pjlúe. Gueniyo llëno wlo, woyde ga miydëy pjlú guing. ⁹ Kjok llgwekklo li, e twara Sbörë beno oba jëk lōng pjlo bëy li llgwekklo llēm, e twara beno oba jëk lōng llëbo owa shäryë li llgwekklo. E beno ëye kjok llgwekklo kolë llēm li llgwekklo, ëye llëbo owa shäryako llēm li miydë pjlú gueniyo shärye enido li llgwekklo, ëye, ba kong ga Sbö tjwlō llēm li llgwekklo, ëye owa shäryë enido li llgwekklo, ëye Sbö kolë llēm li llgwekklo, ëye Sbö bangkjre llēm li llgwekklo, ëye ba data, ba mekë zrök li llgwekklo, ëye no oblë zrök li llgwekklo, ¹⁰ ëye

pë no orkwosmono ba tjok llëm tjok li llgwekklo, domer pë domer oblë tjok li llgwekklo, ëye no shak ga soyneya oblë kong ä li llgwekklo, ëye jyörkë ä li llgwekklo, ëye tjlä jlökoyo gueniyo oblë jyöyotke shdungoba wlo ä li llgwekklo bakoe. Shärye enishko ga tjlökwö bek li shäryayde löng llëme. ¹¹ Tja kjrara, ichara Sbörë ba tjlökwö roy pjlú'lë oba kong. Sbö, e wopjlúe.

Pablo kjimtara Tjlapgarë ara

¹²⁻¹³ Dënashko ga Sbö läywër shäng owa, ba tjlökwö kjrägaga irpjan shäng, llëbo owa shäryër ba kong wlo. Gueniyo eshko ga tja songe lara Sbörë, llëye shäryër shäng li owa miydoror shäng llëm kjishko, ba tjlökwö kjrotë llëm obi kjishko bakoe. Eni ëmdë ga tja ña bi pjluyo Cristo Jesúsde ga parkaga pjlú wleniyo, ga tja iara beno shäng ba parkaga shara, tja kong dbo twara shäryër wlo. E kjishko ga tja wopjlú ba tjok. ¹⁴ Tjlapga wopjlú li kjishko ga tja kjimtara ara anmoyö. Tja tona beno tjeng Cristo Jesús tjok kjishko ga tja iara beno shäng mär ba go, ga tja iara oblë woydë ara baïya dik.

¹⁵ «Cristo Jesús öör kjok ëre kjing go nopga owa li döga» lëba eni ñyadoe. E eni jlöe. Tjlökwö ëre kjrako. Tjara llëbo owa shäryono ara, oba uunkong kjinmo. ¹⁶ Tja owa anmoyö kjishko ga tja songe lara Sbörë, ga tja kjimtara, ñya nopga mär löng ba go lirë wlo. E go ga miyde lok ga Jesucristo, e iirkë bi kong mäling llëm, ga ëye omtjlökwö kjrë ga kjimte, ga ie ber löng së ñyado ba tjok bakoe. ¹⁷ E kjishko ga Sbö, e poshrëy, iëy ber kësbang, tjwlö ara ñyado. Bi pjluyo sök ñyado, wolon llëm, ñgöy llëm, Sbö kjilaraso li e. Ber eni.

18 Timoteo, pja bor wa wleni. Dēnashko ga pja parkē Sbō kong sorē lara Sbörē bi pje yoga kjone kjone kong, ga epga omlono bi kong. Tjłkwo lēr bop kong shāryēp wlo 'li ēre, e lēr bop kong, pak lara lok tek dēnashko li shāryēp pjlú anmoyō wlo. 19 Eni ga pja mär shāng Jesús go jlōkoyo, ga llēbo pjlú miydēp 'li shāryēp eni. Kjone kjone omshāryono eni llēme. E kjīshko ga epga jēk Sbō tjok ame. 20 Himeneo omshāryono eni, Alejandro bakoe. E kjīshko ga ioror beno tjeng Ä wloshko. E goshko ga opping bi Sbō, e lāywe owa ame wlo.

2

Shji syōshtë sorē

1 Bām go ga rokēr bop kong ga pja syōshtos Sbō kong nopga uunkong kjīshko. Rokos ba kong ga epga kjimte wlo. Ga llēbo pjlú shāryara 'li kjīshko ga pja tjlē ba kong ga «Tja wopjlú bop tjok» lēp ba kong eni. 2 Pja syōshtë pjlupga kjīshko, no ichagaga kjīshko bako, shji ber lōng wlēp wlo, shji barwe lok llēm wlo bakoe. Eni ga Sbō poshrēy ga pjlú, llēye woyde Sbörē 'li shāryēy ga pjlú bakoe. 3 Shji syōshtë eni, e pjlúe. Shāryēy eni ga Sbō bi dōga ber wopjlú bi tjok. 4 Woyde ga nopga dār uunkong. Woyde ga tjłkwo bek 'li miyde lok wēlē bakoe. Tjłkwo bek 'li, e eni: 5 Sbō, e kjaraso; bi iaga ber lōng wlēp Sbō tjok 'li, e kjaraso bakoe; domer Cristo Jesús 'li e; 6 e optwono wolono, ber nopga uunkong potjwlēkkło wlo, epga dār wlo. Tjłkwo ēre dbaryo iara Sbörē beno 'li oōtong tjān. 7 E kjīshko ga tja ichara ba roy shdōk, tja iara beno shāng ba tjłkwo roy 'laga Jesús āska. Tja shāng jyōrkē llēme. Tja tjlē shāng beke.

Tja ichara tjlökwo bek li roy lë nopga judío llëm wleniyo kong, shji mär Jesús go sorë li lër ba kong bakoe.

⁸ Woydër ga nopga löng kjok kjwang jikong syöshtë Sbö kong. Gueniyo ga orkwo poyong syöshtë wloshko ga woydër ga wotjlik bëy, iirkë ë kong llëm, ëng dboryë kar kar iir go llëm bakoe.

⁹ Walëga, e woydër ga shwong pjung pjlo bek, yõtso. Wotjlik doyë, opyë shäng oba bokso wolësowa anmoyõ, ãya domergarë wlo ga owa. Opyë ber wolësowa wlo le ga käkzong poshärye ara anmoyõ, dbur sho shöylör pje ara, shwong tjwlõ ara wleniyo pjüya ga owa. ¹⁰ Opyë ber wolësowa wlo ga woydër ga llëbo pjlu shäryayde dey. Walëga Sbö poshrëga le ga woyde ga wotjlik eni.

¹¹ Eye shäng Sbö tjlökwo roy lëshko ga woyde ga kuya walëgarë löng kjing, dborye lok llëme. ¹² Nopga ëng tönö löng Sbö tjlökwo roy lë ëng kongshko ga walëga ichër domerga ping llëme. Domerga ichaga ber walërë llëme. E kjishko ga woydër ga kuya walëgarë löng kjing erä. ¹³ Adán, e shäryara Sbörë bäm go. Eva, e shäryara ba irgo. ¹⁴ Jyäpgwara Ärë li, e Adán llëme. Evara jyäpgwara, ga llëbo owa shäryara. ¹⁵ Gueniyo walëga, e döya wlo jlöe. Gueniyo ga iara beno wapga weng wlo, wapga dë wlo. Woyde ga mär Sbö go, oba woydë pjlu, jëk löng pjlo bek Sbö bokso, ikoba pjlu wlo. Shärye lok enira där.

3

Jesús tjlökwo kjraga kägäyoga

¹ Oba tjlẽ ga «Ëye wotjlik opyẽ ber sök Jesús tjlõkwo kjruga kägäyo ga wotjlik llẽbo shäryẽ pjlúe» lëba eni. E eni jlõe. Tjlõkwo ère kjrako. ² Eni ga èye pak ère shäryẽ wlo ga woyde ga e llẽbo owa shäryono lëba ga äe. Woyde ga boy kjlaraso. Woyde ga llẽbo shärye ga woyotjlïya yõtso guing, jëk shäng yõtso, pjlo bek, bangkjreba wlo. Woyde ga ëbo tjwe ba shwoy ga wlokjre sök wopjlú iyado. Woyde ga oba ping pjlú wleniyo. ³ Woyde ga nelõtkë ä wleniyo llëm, engkjwë ä wleniyo llëm bakoe. Woyde ga shäng wopjlú wleniyo, eng dboryë oblë tjok ä wleniyo llëm, dbur sïyo llëm wleniyo bakoe.

⁴ Woyde ga ba pjeyoga löng ushko li de sök pjlo bek. Woyde ga e kole, bangkjre ba wapgarë pjlúe. ⁵ ¿Shärye ba ushko eni llëm ga Sbõ tjlõkwo kjruga de sorëro?

⁶ Jesús tjlõkwo kjruga löng kjwlë já wleniyora, e iëy ber no kägäyo wlo llëme. Llëm ga ioroy wleni ga wotjlik owa kjwe, «Tja tjwlõ ara» le ba pjlúshko Ä dik, ga ber shdungko bakoe.

⁷ Woyde Ärë ga Sbõ tjlõkwo iëba ber tjwlõ llëme. E kjishko ga woyde Sbörë ga tjlõkwo kjruga kägäyo li, e bangkjre tjlõkwo kjruga llëm wleniyo lirë bako, lanyotke lok owa ga ä wlo, Sbõ tjlõkwo iëba ber tjwlõ ara wlo.

Jesús tjlõkwo kjruga kägäyo kjimtaga

⁸ Woyde ga Jesús tjlõkwo kjruga kägäyo li kjimtagaga ber löng eni bakoe. Woyde ga jëk löng pjlo bek, bangkjreba wlo. Woyde ga tjlë bëy wleniyo, nelõtkë ä wleniyo llëm, dbur shak jyõ go ä wleniyo llëm bakoe. ⁹ Woyde ga tjlõkwo pina Sbörë bi kong li, e söya lok jlõkoyo, jëk e go. Woyde ga llẽbo pjlú

miyde li shärye eni ñyado bakoe. ¹⁰ Woyde ga tjľy bäm go guing. Ñoy ga llëye owa shärye llëm ga ber tjľokwo kjruga kägäyo kjimtaga eshko jā.

¹¹ Woyde ga walëga ber löng eni bakoe. Woyde ga jëk löng pjlo bek, bangkjrëba wlo. Woyde ga no läywe owa ä wleniyo llëme. Woyde ga llëbo shärye ga woyotjľiya yötso guing wleniyo. Woyde ga llëye le ë kong ga shärye eni wleniyo bakoe.

¹² Tjľokwo kjruga kägäyo kjimtaga li, e woyde ga boy kjlaraso. Woyde ga ba wapga, ba pjeyoga löng ba ushko li, e de sök pjlo bek. ¹³ Llëbo pjlu shäryara ba pakshko ga iëba ber tjwlo ara. Eni ga shji mär Cristo Jesús go sorë le oba kong, ga llëye bangkjre llëme.

Jesús tjľokwo, e tjwlo ara anmoyö

¹⁴⁻¹⁵ Tja wotjľik jek bop ik maling, gueniyo tja jek llono miydër llëme. E kjishko ga tja jek äär maling llëm wleni ga kjibokwo ëre tër, ichër jek bop kong, woyde Sbörë ga ba wapga jëk sorë li miydëp kjibokwo ëre go wlo. Shji Jesús tjľokwo kjruga, shji Sbö wapga. Sbö sök ñyado. Ga ba tjľokwo bek li, e twara beno bi kong, söy wlo, e jlöe lëy oblë kong wlo bakoe.

¹⁶ Ba tjľokwo jnena Sbörë li, e pina bi kong. Tjľokwo ëre tjwlo ara anmoyö jlökoyo. Ère eni: Jesucristo, e weno shäng kjok ëre kjing go so no kjoyoe.

E beno pjlo bek Sbö bokso li pina Sbö Sëyarë oba kong.

E ñna Sbö parkagaga kjok dogo sorë.

Roy laraba tjëyoga oblë oblë kong kjok kjwang jikong.

Tjlōkwo kjararaba kjok ëre kjing go.
Ga söra Sbörë to jem kjok dogo.

4

Tjlōkwo bek llëme

¹ Sbö Sëya tjlë bi kong wëllë ga «Dbar tjwe kjwara ga kjone kjone, tjlōkwo pimi löng li, e söya lok ame. Eshko ga jyâpgwe Ä sëyagarë, ga sëya li tjlōkwo kjayde shara» le. ² Tjlōkwo owa li, e laga nopga jyō ä wleniyorë. Llëbo owa shärye lokshko ga bangyo ba kong ame. ³ Epga tjlë ga «Shji orkwosmok ga owa» le eni, «Dli, e uako uunkong llëme» le eni bakoe. Eshko ga jyörkonoe. Dli llë pogo, e iara Sbörë beno uëy wlo. Ga shji tjlōkwo bek li kjruga, dli llë uëyshko ga woyde Sbörë ga shji syöshtë ba kong, tjlë ba kong ga «Tjawa kong dli tworop ëre. Tjawa ber wopjlú bop tjok e kjishko» lëy eni. ⁴⁻⁵ Llëbo uunkong shäryara Sbörë li, e pjlú, Sbö tjlōkwo tak beno pjang eni kjishko, dli li syōyoshtoroy kjishko bakoe. Eni kuzong ga «E uako llëme» lëy llëme. Woyde Sbörë ga uëy, shji wopjlú ba tjok dli li kjishko.

Timoteo poshduna Pblorë

⁶ Bi pjeyoga Jesús tjlōkwo kjruga li, e pīs tjlōkwo ëre go. Eni ga pja ber Cristo Jesús parkaga pjlú wleniyo, ga pja opping jek këgong këgong tjlōkwo bek söp shäng li goshko. ⁷ Llëbo weno tjlapgaga tek dënashko so kong, shji kjimte Sbö kolë llëm wleniyo, tjwlō llëm wleniyo, e läywëba bop kongshko ga tjlōkwo kup llëme. Pja drön ëë, pja opsguë jëk shäng pjlo bek Sbö bokso wlo dey. ⁸ Shji drön

ëë, bi doyo iëy ber kjlo kjang wlo, e ber bi kong pjlu jlkoyo. Eni gueniyo ga shji jëk shäng pjlo bek Sbö bokso, e tjwlö e kjinmo anmoyö. Shäryëy eni ga shji kjimte kjok ëre kjing goshko, ga shji to ber löng Sbö tjokshko ga shji kjimte eshko bakoe. ⁹ Lëba eni li, e eni jlöe. Tjlökwo ëre kjrako. ¹⁰ E kjishko ga shji parkë drön ara. Sbö sök iyado, no döga li e, ga ëye mär ba go ga döya uunkong. E kjishko ga shji löng ba koshe.

¹¹ Pja to shäng oba ping tjlokwo ëre go, ga ichos ba shäryë. ¹² «Pja mite jä. Tjlökwo lep borwa kong llëm e kjishko» lëba bop kongshko ga kolëp llëme. Pja tjlokwo lep pjlu, pja jëk pjlo bek, oblë woydos pjlu, pja mär Sbö go, llëbo owa shäryëp llëm bakoe. Shäryos eni, iya Jesús tjlokwo kjrägaga löng lirë wlo, epga omshäryë bopoya dik wlo. ¹³ Tja äätë llëm obi wopro ga pja ber shäng Sbö tjlokwo buk li lë oba kong, oba pim tjlokwo li go, dbokjrë wlo, ga poshdum bakoe. ¹⁴ Dënashko ga pja parkë Sbö kong sorë li lara Sbörë bi pjeyoga kjone kjone kong, ga epga omlobo borwa kong. E irgo ga tjlapgaga Jesús tjlokwo kjräga kägäyo orkwo iono lok bop dlu kjing go, pja ber shäng dboy Sbö kong wlo, ga pja kong kjok miydë twara Sbörë, pak li shäryëp ba kong wlo. Eni ga kjok miydë twara bop kong li go ga pak twara bop kong li shäryos iyado.

¹⁵ Tjlökwo ëre woyotjlip ara, shäryëp yötso, pja jëk shäng ba shäryë jek këgong këgong ikoba uunkong wlo. ¹⁶ Pja jëk pjlo bek, oba pim tjlokwo bek li go eröe. Pja opdos yötso, e shäryëp wlo, ga rayëp llëme. Enira pja där, oba bop kuga li, e där bakoe.

5

Shji opshäryë ëng tjok sorë

¹ Tjlapga këkboga, e llëbo owa shäryono ga wlöy kjang llëm, poshdüs yõtso dey, bop data wleni. Domerga luyo bop dorko anmoyõra, pja opshäryë bop lëmgä tjok sorë ga pja opshäryos ba tjok eni bakoe. ² Walëga këkbogara, pja opshäryë bop mekë tjok sorë ga pja opshäryos ba tjok eni bakoe. Walëga luyo bop dorko anmoyõra, pja opshäryë bop dorga tjok sorë ga pja opshäryos ba tjok eni bakoe. Pja wotjlik llëbo owa shäryë ba tjok sira llëme.

³ Syãpgara, kjimtaga ërë llëm wleniyo ga kjimtozong. ⁴ Gueniyo ga wapga, tjërga tjok wleni ga kjimtaga ber epgarë. Sbö bokso ga bek li e. Epga, e kuna tek chilawa dwayo öötong këskëse. Era ba mekë, ba tjëtë beno syã li, e kjimtaga ber epgarë shara. ⁵ Syã jlökoyo, kjimtaga ërë llëm wleniyo ga e mär ber Sbö go eröe. Ber shäng syöshtë ba kong shkë dba, kjimte wlo.

⁶ Gueniyo syã, e wotjlik Sbö llëm, to shäng llëye wen ba pjlúshko li shäryë wleni ga e tjwlö ame, no wolono buk wleni. Era kjimtako llëme.

⁷ Tjlökwo ëre los Jesús tjlökwo kjrägaga kong, llëbo shäryara lok owa lëba ga ä wlo. ⁸ Eye ba pjeyoga löng ba ushko li kjimtë llëm ga tjlökwo kjrara li, e shärye shäng llëme. Sbö tjlökwo kjrägaga llëm löng li ëmdë ga ba pjeyoga, e kjimte.

⁹⁻¹⁰ Jesús tjlökwo kjrägaga kjimtëy wlo li, e ko tëy kjibokwo go. Syãpga, e ko tëy kjibokwo e go wlo ga woyde ga lu pjloglo sak tjer (60) jem lëkong eröe. Woyde ga öör sök ba lanma tjok pjlo beke. Woyde

ga llëbo pjlú shärye oblë kong ara, ba wapga kuna pjlo bek, ëye tjwe ba shwoy ga wlokjre sök wopjlú, Jesús tjlökwo kragaga äär ba ushko ga dreglo shkwe ber wopjlú wlo, no song wleniyo kjimte, parkë oblë kong ara bakoe. Woyde ga miydëba e go. Syäpga eniyo ko toydë pjang kjibokwo li go.

¹¹⁻¹² Gueniyo ga syäpga mite obira ko tako pjang kjibokwo li go wlo llëme. Ko tÿshko ga tjlë ga «Tja orkwosmok ame. Tja parkë ber shäng Cristo kong eröe» le jlökoyo. Gueniyo e irgo ga orkwosmok woydë obi. Eshko ga tjlökwo lara Cristo kong jlökoyo li, e shärye lok ame. E shärye eni ga e llëbo owa shäryayde. ¹³ E shäryayde dö llëme. Opsguë löng shmirkë ara, to löng sjok sjok oba löng sorë ik, oba läywe, tjlökwo lako llëm li le bakoe. ¹⁴ E kjishko ga woydër ga syäpga mite obi li orkwosmok dey. Woydër ga wapga tjok, ga ber löng ba ushko, ba wapga dë, läywe bi wloyogarë llëm wlo. ¹⁵ Eerishko ga syäpga kjong kjong Jesús tjlökwo rayono tjän, beno jëk löng Ä tjok. Tjlökwo ëre lër bop kong e kjishko.

¹⁶ Eni ga walëga Jesús tjlökwo kragaga, ba pjeyoga syäpga tjok wleni ga woyde ga kjimte om go, pak li ber Jesús tjlökwo kragaga oblë li kong llëm wlo, syäpga kjimtaga ërë llëm löng li kjimte lok ga pjlú wlo.

¹⁷⁻¹⁸ Sbö tjlökwo tak pjang li tjlë ga «Sögïa parkoklo wleniyo, e ichëy dwla kjwokäkshko ga kjamo kjrochako llëm, dwla li ue ga pjlú wlo.»* Tjlë obi ga «Ëye parkë ga e potjwlëkko.»† E kjishko ga tjlapgaga Jesús tjlökwo kragaga kägäyo parkë pjlú

* **5:17-18** Deuteronomio 25.4. † **5:17-18** Lucas 10.7.

wleni ga woyde ga bangkjrëba pjlú, potjwlëkoba pjlú bakoe. Oba pingga Sbö tjlökwo go, oba poshdungga, e woyde ga bangkjrëba, potjwlëkoba pjlú, oblë oblë li kjinmo.

¹⁹ Jesús tjlökwo kjruga kägäyoga li rotëbashko ga rotaga no kjaraso dörë wleni ga tjlökwo kjrëp llëme. Woyde ga no söya ba rotaga lirë pjök mya ba tjok, «E ñorwa om go jlökoyo» le lok wlo. Eni ga shdum ga pjlúe. ²⁰ Eshko ga llëbo owa shäryono jlökoyo wleni ga woyde ga wlongko oba bokso, bangkjrëba wlo, omshäryë lok eni llëm wlo.

²¹ Eye llëbo owa shäryono ga woydër ga llgwes yõtso, beke. «Kjwe woydër ara kjïshko ga shdun llëme» lëy bi pjlúshko llëme. «Kjwe woydër llëm kjïshko ga shdun ara» lëy llëm bakoe. Sbö, Cristo Jesús, Sbö parkagaga kjok dogo so, e löng bop ñga.

²² Jesús tjlökwo kjruga kägäyo kjrëpshko ga shäryëp maling llëme. Jëk shäng pjlo bekde ñp yõtso guing. Llëm ga shäng llëbo owa shäryë wleni ga owa shärye shäng li ber pjlú bop kong lëba eni. Ga pja om go li llëbo owa shäryë llëme. ²³ Gueniyo ga pja bögwö bang ara wop sit wop sit kjïshko ga di iopdë dö llëm, kjïlgwo bo dyo dbo ara iopdë sira bakoe.

²⁴ Kjone kjone llëbo owa shäryono li miydëy jekdo. Gueniyo kjone kjone eni llëme. Miydëy llëm, jëk sorë ñnoy yõtso guing. ²⁵ Llëbo pjlú shäryëy li, e eni bakoe. Olö ga ñkoba wëllë jekdo. Olö ga ñgaba llëm, gueniyo dbar tjwe kjwara ga miydëba eshko jã.

6

¹ Ĕye parkagaga tjwlĕk lōng pjir wleniyo ga woyde ga ba sogo bangkjre jlōkoyo ĩyado, Sbō lāywēba llēm wlo, tjlōkwo lēy lōng li lāywēba llēm wlo bakoe. ² Ba sogo, e Jesús tjlōkwo kjraga wleni ga woyde ga bangkjre, parkē ba kong pjlú anmoyō, ba sogo kjimte shāng li, e ba pjeyo Jesús tjlōkwo kjraga woyde ara wleniyo kjīshko. Tjlōkwo lēp nopga kong wlo, shārye lok wlo li e.

Llēbo tjwlō ara

³ Tjlōkwo lara bi Tjlapga Jesucristorē shāryēy wlo li, e beke. Shji jĕk pjlo bek Sbō bokso sorē li miydēy e go. Ĕye oba ping tjlōkwo oblē bek llēm wleniyo go ga ⁴ krē ä wleniyo, llēye miyde llēme. Llēbo tjwlō llēm wleniyo le ĕng kong kar kar ä, go swlo wleni. Tjlē eni kjīshko ga wotjlik owa oblē kong ba llēbo kjīshko, ĕng dboryē kar kar iir go, ĕng lāywē owa, «Kjīlara kjwe owa» le ba pjlūshko ĩyado. ⁵ Epga ĕngkjwē ĕng tjok li pjir llēm, wotjlik owa kjīshko. Tjlōkwo bek li miyde ame. Oba pīya lok Sbō tjlōkwo go, dbur shak e go wlo erōe.

⁶⁻⁷ Shji jĕk pjlo bek Sbō bokso li, e tjwlō ara jlōkoyo. Gueniyo woyde ga shji lōng wopjlú bi llēbo tjeng li tjok bakoe. Shji weno bukshko ga llēye sōroy tek bi tjok llēme. Shji wolonoshko ga llēye sōy jek bi tjok llēm bakoe. E kjīshko ga woyde ga shji lōng wopjlú bi llēbo tjeng li tjok. ⁸ Eni ga shji shwong tjok, shji dli tjok wleni ga woyde ga shji lōng wopjlúe. ⁹ Gueniyo ĕye opyē woydē dbur ara ga llēbo owa shārye. Opsrek lōng ara ba wotjlik owa li go, gueniyo miyde lōng llēme. Eshko ga beno lōng song erä, to pjir wlo. ¹⁰ Ĕye dbur woydē ara

anmoyō ga dbur wlĕk wlo ga llĕbo owa shārye llĕ pogo. Kjone kjone wotjlĭk dbur wlĕk erā kjĭshko ga beno lōng mār Sbō go ame, beno lōng song erā.

Pablo tjlĕno Timoteo kong, Timoteo dbokjrĕ wlo

¹¹ Gueniyo pja Sbō ĩ kuzong ga pja opkwos llĕbo owa lĕr shāng bop kong li dwayo. Llĕbo pjlú li shāryopdĕ dey. Pja jĕk shāng pjlo bek Sbō bokso. Pja mār Sbō go. No oblĕ woydos ara. Llĕbo wen tjwe bop kong owashko ga pja wosonkĕ llĕme. Pja llĕbo shāryĕ oblĕ kong yōtso. ¹² Pja drōn ĕĕ, pja mār Sbō go wlo, lorop nopga ara kong dĕnashko sorĕ li eni, pja ber shāng sĕ ĩyado Sbō tjok wlo. Pja rokara Sbōrĕ e kong wlo. ¹³ Rokĕr bop kong ga tjlōkwo los bor kong jlōkoyo. Miydaga ber Sbōrĕ, shjilōng sĕ, llĕ pogo lōng sĕ, e laga erĕ. Miydaga ber Cristo Jesúsdĕ bako, era tjlōkwo lono pjlú, Poncio Pilato boksho. ¹⁴ Llĕye loror bop kong li shāryos uunkong eni, āār jong bi Tjlapga Jesucristo tjwe irōng obi guing. ¹⁵ Dbaryo li wlĕna Sbōrĕ om go, ga oōtongshko ga tjwe eshko jā, ichak Sbōrĕ. Sbō, e wopjlúe.

Kjok ĕre uunkong ichaga li e erōe.

Pjlupga uunkong pjluyo li e.

No kägāyoga uunkong kägāyo li e

¹⁶ Wolon llĕm sōk ĩyado li e erōe.

Iōk jong kjwara shjiy, kāā lletllet wleniyo,

ĕye āār eshko ga āe.

Sbō sōk iōk shjiy li roshko.

ĕye omĭydĕ llĕm,

ĭgōy llĕm bakoe.

Poshrĕkko ĩyado li e.

Dbo ara ĩyado li e.

Ber eni.

¹⁷⁻¹⁹ No kjone kjone dbur ara kjok ëreshko. Pja tjlë ba kong ga «Bomi dbur kjishko ga pjây tjwlõ ara, oblë kjinmo lëmi llëme. Dbur, e ÿyado llëm kjishko ga pjây mär bomi dbur go dö llëme. Gueniyo Sbö, e sök ÿyado, llëbo twe bi kong ara, shji ber'löng wopjlú wlo. E kjishko ga pjây mär ba go erö dey. Llëbo pjlú shäryozã. Shäryoromi eni li, e tjwlõ ara, bomi dbur kjinmo. Oblë ÿmi ga song ga bomi llëbo shdözã ba tjok wopjlúe. Eni ga llëbo tjwlõ ara li ber bomi kong kjok dogo, ga pjây ie Sbörë ber'löng së ÿyado ba tjok» lëp ba kong eni.

Kjibokwo pjirzlong

²⁰ Timoteo, pja iara Sbörë beno shäng ba tjlökwö roy lë oba kong wlo. Eni ga shäryos yõtso. Llëbo tjwlõ llëm lanyotkëba löng li, e jyõ erä. Tjlë löng jlõ wleni, gueniyo jlökoyo ga kjok miyde lok sira llëme. Ba tjlökwö li kup llëme. ²¹ No kjone kjone, tjlökwö ëre kjrara, ga beno löng mär Sbö go ame.

Rokër Sbö kong ga ba wopjlú li kjishko ga pja kjimte ara.

**Sbö Tjłõ^{kwo}
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

© 2008, 2007, Wycliffe Bible Translators, Inc.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

539cf8e3-01bf-5f34-8833-610f18367f8c